

योएलया सफू म्हसीका

योएल अगमवत्ताया बारे कम खँ जक सीकिफुगु दु। वया जन्म व मृत्यु गुबलय जुल धयागु खँ बांलाक सी मदु। अले योएलं थःगु भविष्यवाणी गुबलय याःगु खः धयागु खँ नं झीसं मस्यु। वयागु बारे पुलांगु नियमय् गन नं च्वयातःगु खने मदु। बरु न्हगु नियमय् पन्हुसं प्रेरित २ अध्यायलय् वयागु बारे धाःगु दु। योएलं यस्सलेमय् च्वंपिं मनूतयत् व यहदाया मेमेगु थासय् च्वंपिं मनूतयत् परमप्रभुया सन्देश न्यंकेगु याःगु खः।

यहदाय क्वःबुईचायागु तसकं ग्यानापुगु महामारीं हमला याःगु खः। अथे जुया फुक्क देशय् तसकं ग्यानापुगु अनिकाल जुल। योएलया थ्व सफुलिइ थुपिं फुक्क खँया बारे च्वयातःगु दु। योएलं थुपिं घटनातय् परमप्रभुया वयेत्यंगु दिया चिं खनी, थज्याःगु छगू ई गुबलय् वय्कलं थःगु व्यवस्थाया विरोधय् विद्रोह याःपिन्त सजॉय बियादी। परमप्रभुया थ्व दिं मेमेगु देशयापिन्त सजॉय बीगु ई खः अले इस्राएलया मनूतयत् उखुन्हु सुवाः बीगु ई खः धकाः गुलि गुलिसिनं विश्वास याइ। तर मेमेपिं अगमवत्तातयसं थें योएलं उगु दिखुन्हु वय्कःया आज्ञा मानय् मयाइपिं मनूतयत् वय्कलं दण्ड बियादी धकाः इमित स्यनेकने यात। अयनं परमप्रभुं पश्चाताप यानाः वय्कःयाथाय् लिहां वयेगु नितिं सःता च्वंग दु धकाः योएलं मनूतयत् धाःगु दु। अले परमप्रभुं मनूतयत् हाकनं न्हापायागु हे बांलाःगु अवस्थाय् थापं यानादी व वय्कःलं बाचा यानादीकथं इमित आशिष बियादी धकाः नं धाःगु दु।

थ्व सफूया तसकं दुयंगु ब्वः २:२८-३२ पद खः, परमप्रभु परमेश्वरं थः फुक्क मनूतयत् थःगु पवित्र आत्मा बीगु बचं बियादीगु दु धकाः योएलं धाल। अले थ्व खँ प्रेरित २:१७-२१ पदय्, पेन्तिकोसया दिखुन्हु जूगु थुपिं खँतपाखें योएलया थ्व भविष्यवाणी सत्य खः धयागु दसि बिल धकाः पन्हुसं धाल।

धलः पौ

क्वःबुईचातयगु विपत्ति १:१-२:१७

हाकनं थापं यायेगु बचं २:१८-२७

परमप्रभुया दिं २:२८-३:२१

योएल

क्वःबुईचातयस् देशयात भज्यंक स्यंकाब्यूगु

1 पतुएलया काय् योएलयाके वःगु परमप्रभुया वचन।

2 हे थकालिपि मनूत, थ्व खँ न्यौ!

हे यहदा देशय् च्वंपि सकल मनूत, बांलाक ध्यान बियाः न्यौ!

छु छिमिगु इलय् अथवा छिमि तापाःबाज्यापिनिगु इलय्

गुबलें थथे जूगु दु ला?

3 छिमि काय् म्हायपिन्त थ्व खँ न्यकि,

अले छिमि काय् म्हायपिन्सं इमि काय् म्हायपिन्त न्यंकेमाः

अले इमि काय् म्हायपिन्सं मेगु पुस्तायात न्यंकेमाः।

4 चाइपि क्वःबुईचातयस् गुलि त्वःताथकूगु खः,

व पुचलय् वःपि क्वःबुईचातयस् नयावन।

पुचलय् वःपि क्वःबुईचातयस् गुलि त्वःताथकूगु खः,

व तिन्हुइपि क्वःबुईचातयस् नयाबिल।

तिन्हुइपि क्वःबुईचातयस् गुलि त्वःताथकूगु खः,

व स्यंकीपि क्वःबुईचातयस् नयाबिल।

5 अय् अय्लाःगुलुत दँ, तःसलं ख्व!

अय् दाखमघ त्वनीपि न्हगु दाखमघया लागिं ह्यँय्ह्यँय् ख्व,

छाय्धाःसा आवंलि छिमिगु म्हुतुइ दाखमघ लाइ मखुत।

6 अल्याख मनूत दुगु छगू बल्लाःगु जाति

जिगु देशयात हमला याःगु दु।

वयागु वा मिजंम्ह सिंहया वार्थे च्वं

अले वयागु धँवा मिसाम्ह सिंहयागु थें च्वं।☆

7 वं जिगु दाखमा न्हंका ब्यूगु दु,

अले जिगु यःमरिमा सखाप यानाब्यूगु दु।

वं उकियागु ख्वला प्वलाः नांगा यानाः वान्छवया बिल।

अले दाखमायागु कचायात तुइसे च्वंकाः त्वःताबिल।

8 थः ल्यासे जूबलय्याम्ह भाःतया निति

भांग्रा फिनाः ख्वइम्ह ब्याहा जुइत्यंम्ह मिसा थें ह्वाँय्ह्वाँय् ख्व।

9 परमप्रभुया देगलय् अन्नबलि व त्वँसाबलि छायेगु बन्द जूगु दु।

परमप्रभुया न्ह्यःने परमप्रभुया सेवक पुजाहारीत ह्वाँय्ह्वाँय् ख्वयाच्वन।

10 बुँयात उजाड यानाब्यगु दु।

बँ सुख्खा जूगु दु,

अन्न नष्ट जूगु दु,

न्हगु दाखमघ मदये धुकल,

चिकं नं मदये धुकल।

11 अय् बुँज्या याइपिं, निराश जु।

अय् दाखमा पीपि ह्वाँय्ह्वाँय् ख्व।

छ्व व तछ्वया लागिं ह्वाँय्ह्वाँय् ख्व,

छाय्धाःसा बुँयागु अन्न नष्ट जूगु दु।

12 दाखमा सुकूचिन,

यःमरिमा गन।

धालेमा, खजूरमा, स्याउमा,

क्यबयागु थुपि फुकं मा सुकूचिना वन।

धात्थें हे मनूतयगु लय्ता नं फुनावंगु दु।

पस्ताय् चायेत इनाप

13 हे पुजाहारीत, भांग्रा फिनाः नुगःपा दादां ख्व!

हे वेदीया न्ह्यःने सेवा याइपिं, ह्वाँय्ह्वाँय् ख्व!

हे जिमि परमेश्वरया न्ह्यःने सेवा याइपिं,

भांग्रा फिनाः चच्छि च्वँ,

छाय्धाःसा छिमि परमेश्वरया छँय्

अन्नबलि व त्वँसाबलि छाये हयेगु दीधुकल।

14 पवित्र अपसं घोषणा या,

पवित्र मुँज्या सःति।

परमप्रभु छिमि परमेश्वरयागु देगलय्

देशय् च्वंपिं सकल मनूत

अले थकालितय्त मुंकाः

परमप्रभुयात पुकारा या।

15 हाय! व दि!

छाय्धाःसा परमप्रभुया दि लिक्क दु।

व ला दक्व शक्ति दुम्हपाखें सर्वनाश थें हे वइ।☆

16 झीगु मिखां खंक हे नयेगु नसा नष्ट मजू ला?

अले आनन्द व लयता परमेश्वरयागु देगलय् बन्द याःगु मदु ला?

17 पुसा चाग्वारा क्वय् सेकुन,

धुकुति उजाड यानाबिल,

अले अन्नया धुकुति न्हावन,

छाय्धाःसा अन्न सुकूगनावने धुंकल।

18 पशुत गथे यानाः ख्वयाच्चंगु दु।

सा द्रहंतय्गु बथांत वाथा वाथा जुयाच्चंगु दु

छाय्धाःसा इमिगु निंति ज्वयेगु थाय् मदु।

फैच्वलय्या पुचः नं कष्टय् लानाच्चंगु दु।

19 हे परमप्रभु, जिं छिके ग्वाहालि फवने।

छाय्धाःसा मरूभूमिइ च्वंगु घाँय्ख्यः मिं नःगु दु,

अले मियागु जलां गुँइच्चंगु सिमा छ्वय्काब्यूगु दु।

20 गुँपशुतय्सं नं छिके ग्वाहालि फवनी,

छाय्धाःसा खुसि सुनावने धुंकल,

मिं पशुत ज्वयेगु थाय्यात भस्म याःगु दु।

2

सेनां थें क्वःबुइँचां हमला याःगु

1 सियोनय् तुरही पु!

जिगु पवित्र पर्वतय् ख्याच्चःया सः न्यंकि!

देशय् च्वं पिं सकल मनूत थरथर खायेमा,

☆ 1:15 १:१५ यशै १३:६; इज ३०:२-३; सप १:१४-२:३

छाय्धाःसा परमप्रभुया दि वयाच्चंगु दु,
व लिक्क वयाच्चंगु दु।☆

2 खिउँसे व म्हाइपुसे च्वंगु दि,
सुपाँय् व यक्व हे खिउँसे च्वंगु दि!
डॉडाय सुथययागु निभाः लाःगु थें
छगू तःधंगु व बल्लाःगु सेना वइ।
अज्याःपिं गुबलें मवनी, हानं गुबलें वइ नं मखु।☆

3 इमिगु न्ह्यःने न्ह्यःने मिं भस्म यानायंकी।
अले इमिगु ल्यूल्यु मिं दनदन च्याइ,
इमिगु न्ह्यःनेया बँ अदनया क्यब थें हे च्वं
अले इमिगु ल्युने मस्भूमि थें च्वं।
इपिपाखें सुं नं बचय् जुइ फइ मखु।☆

4 इमिगु ख्वाः सलतय्गु थें च्वं।
इपि सल गयाः लडाइँ याःवनीपिं मनूत थें हे ब्वाँय् वनी।☆
5 इपि डॉडाय च्वाकय ब्वाँय् जुइगु सः रथतय्गु सः थें
व भस्म याइगु मित्याःया सः थें च्वं,
इपि लडाइँलय् वनेत्यपिं इवःलाक
च्वंपिं बल्लाःपिं सिपाइँत थें च्वं।

6 इमित खनीबलय् जाति जातित ग्यानाः थुरथुर खाइ,
इमित खनाः सकसिगु ख्वाः वँचुसे च्वनावनी।

7 इमिसं वीर सिपाइँतय्सं थें हमला याःवइ।
अले सिपाइँतय्सं थें पःखाः गइ।
इपि इवःलाक न्यासि वनी,
इमिसं इवः स्यंकी मखु।

8 इमिसं छम्हयसिनं मेम्हयसित घ्वाइ मखु,
दक्वं थथःगु इवल्य न्यासि वनी।
अले थःगु इवः मस्यंकुसे हे

☆ 2:1 २:१ यर ४:५-६; इज ३३:३; १ कोर १५:५२; १ थेस ४:१६; प्रका ८:६-११:१९

१:१४-१५

☆ 2:3 २:३ इज ३६:३५

☆ 2:4 २:४-५ प्रका ९:७-९

☆ 2:2 २:२ सप

शत्रुतयस् पनातःगु चिकाः दुहां वनी।
 9 इमिसं शहरय् हमला याःवइ।
 इपि पःखाः च्वय् च्वय् ब्वाँय् वनी।
 अले छँया इयालय्
 इपि खूँत थें दुहां वनी।

10 इमिगु न्ह्यःने पृथ्वी क्वारा क्वारा सनी
 अले आकाश थुरथुर खाइ।
 सूर्य व तिमिला खिउँसे च्वनी,
 अले नगुत नं थी मखु।☆
 11 परमप्रभुं थः सेनातय् न्ह्यःने तसकं थ्वःगु सः न्यंकादी।
 वय्कलं धाःथें याइपि
 वय्कःया सेना तसकं बल्लाः अले यक्व नं दु।
 परमप्रभुया दिं तःधं व सिक्क हे ग्यानपुसे च्वं!
 थ्व सुनां सह याये फइ?☆

पस्ताय् चायेत इनाप

12 परमप्रभुं धयादी, “आः नं छिपि पूरा मन बियाः
 अपसं च्वनाः, ख्वयाः व दुखं च्वनाः जिथाय् लिहां वा।”

13 नुगः मछिकाः थःगु वसः मखु,
 तर थःगु नुगः खुनाः
 परमप्रभु थः परमेश्वरपाखे लिहां वा,
 छायाःसा वय्कः दया व माया क्यनादीम्ह,
 तं क्यनेत हथाय् मचायादीम्ह,
 अले सदां दयामाया यानादीम्ह,
 अले थःगु सजॉय पनेत न्ह्याबलें तयार जुयादीम्ह खः।☆

14 सुनां स्यू- वय्कलं थःगु सजॉय पनादी ला?
 अले सराःया पलेसा आशिष बियादी ला?
 परमप्रभु छिमि परमेश्वरयात

☆ 2:10 २:१० प्रका ८:१२ ☆ 2:11 २:११ भज ७६:७; इज २२:१४; नह १:६; सप १:१४; मला ३:२; प्रका ६:१७ ☆ 2:13 २:१३ प्रस ३४:६; भज ५१:१७; यशै ५७:१५; योना ४:२

छिमिसं छायेत माःगु अन्नबलि व त्वँसाबलि बियादी ला?☆

15 सियोनय् तुरही पु!

पवित्र अपसंया दि घोषणा या,
पवित्र मुँज्या सःति!

16 मनूतयत् मुंकि,

मुँज्यायात अर्पण या,

थकालितयत् मुंकि,

चीधिकःपि मस्त

व दुरु मछ्युनिपि मस्तयत् नं मुंकि!

ब्याहा याइम्ह मिजं थःगु क्वथां

अले ब्याहा याइम्ह मिसा

थःगु दुनेया क्वथां पिहां वयेमाः।

17 परमप्रभुया न्ह्यःने सेवा याइपि पुजाहारीत,

देगःया दलान व वेदीया दथुइ च्वनाः र्ख्वयेमा।☆

अले इमिसं थथे धकाः प्रार्थना यायेमा,

“हे परमप्रभु, थः मनूतयत् दया यानादिसँ।

छि थः मनूतयत् हेस्याके बियादी मते,

अले मेपि जातितयगुपाखें हेपय् याकादीमते।

‘इमि परमेश्वर गन दु’ धकाः

मेपि जातितयत् छाया धाय्के बीगु?”

हाकनं थापं यायेगु बचं

18 अले परमप्रभुं थःगु देशयात तसकं च्यूताः कयादी,

अले वयकलं थः प्रजातयत् माया यानादी।

19 परमप्रभुं थः प्रजातयत् थथे धकाः लिसः बियादिल,

“स्व, जिं छिमित अन्न, न्ह्यगु दाखमघ व चिकं बी!

छिमित माक्व हे बी।

आबंलि मेपि जातितयगु न्ह्यःने

छिमित हेस्याके बी मखु।

☆ 2:14 २:१४ योए १:९,१३; योना १:६; ३:९

☆ 2:17 २:१७ इज ८:१६; मत्ती २३:३५; भज ७९:१०

20 “जिं उत्तरपाखें वःपिं सेनायात
छिमिगु न्ह्यःनै तापाक लिनाछवये,
अले वयात जिं मरुभूमिइ लिनाछवये।
न्ह्यःनेयापिं इवःयात पुर्बय् च्वंगु मृत सागरय्
अले ल्यूनेयापिं इवःयात पच्छिमपाखे च्वंगु भूमध्यसागरय् लिनाछवये।
अले इपिं अन सिनाः तसकं ध्वगिक नवइ।”

धातर्थें हे परमप्रभुं तःतधंगु ज्या यानादिल।
21 अय् यहूदा देश, ग्याये मते!
लयताया च्वँ अले न्ह्यइपुकि!
छाय्धाःसा परमप्रभुं ततःधंगु ज्या यानादीगु दु।✧

22 अय् गुंपशुत, ग्याये मते!
छाय्धाःसा मरुभूमिइ च्वंगु ख्यः वाउँसे च्वंगु दु,
सिमाय् फल सयावःगु दु!
व यःमरिमाय् व दाखमाय् यक्व हे फल सःगु दु।
23 हे सियोनयापिं मनूत, लयता,
परमप्रभु थः परमेश्वरयाके लय लयताता न्ह्यइपुइकाच्चँ!
छाय्धाःसा वय्कलं दकलय् न्हापां वइगु वा छिमित बियादीगु दु,
छाय्धाःसा वय्कः विश्वास याये बहःम्ह खः।
अले छिमिगु नितिं माक्व वा वय्कादी
न्हापागु वा व लिपायागु वा न्हापा थें हे वय्कादी।
24 अले अन्न तइगु थाय् अन्न जाइ,
घःत न्हगु दाखमघ व चिकनं बिलिबिलि जाइ।

25 “गुगु बालियात पुचलय् च्वनीपिं,
प्वाथं चुया जुइपिं, स्यंकीपिं व चाइपिं तःधंगु पुचयापिं
क्वःबुइँचात अर्थात
जिं छिमिगु दथुइ छवयाहयापिं जिगु तःधंगु सेनां नःगु खः,
जिं छिमित उपिं दँया पलेसा पुलाबी।
26 छिपिं प्वाः जाय्क नयाच्चने दइ।

✧ 2:21 २:२१ १ शमू १२:२४; अयू ५:१५; भज ७१:१९; १२६:२

अले छिमिगु लागिं अजू चायापुगु ज्या यानादीम्ह
परमप्रभु छिमि परमेश्वयागु नांया छिमिसं प्रशंसा याइ।

अले जिमि प्रजा गुबलें मछालपुइका च्वने माली मखु।

27 अले जि इस्राएलया दथुइ दु,

जि परमप्रभु छिमि परमेश्वर खः

अले जि बाहेक मेपिं सुं मदु धकाः छिमिसं सी।

जिमि प्रजा गुबलें मछालपुइका च्वने माली मखु।☆

परमप्रभुया दिं

28 “वया लिपा

जिं जिगु आत्मां फुक्क मनूतयत जायकाबी।

अले छिमि काय् म्हायपिन्सं अगमवाणी नवाइ।

छिमि बुरापि मनूतयसं म्हगस खनी।

अले छिमि ल्यायम्ह मनूतयसं दर्शन खनी।

29 अले व दिखुन्हु जिमि च्यः व जिमि भ्वातितय्के नं

जिं जिगु आत्मा प्वंकाबी।

30 अले आकाशय् व पृथ्वीइ

जिं अजू चायापुगु ज्या व चिं क्यने,

अन हि, मि व कुँत्याः खने दइ।

31 परमप्रभुयागु व तःधंगु व ग्यानपुसे च्वंगु दिं वये न्ह्यः

सूर्य खिउँसे च्वनावनी व तिमिला हि थें ह्याँउसे च्वनावनी।

32 अबलय् परमप्रभुयागु नां काइपिनिगु उद्धार जुइ।”☆

3

जाति जातितयगु न्याय

1 परमप्रभुं धयादी, “उगु दिनय् व उबलय् हे

जिं यह्दा व यरूशलेमयापि मनूतयत हाकनं भिं यानाबी।

2 उबले जिं सकल जातितयत छथाय् मुंकाः

यहोशापातया* बैसीइ यंके।

☆ 2:27 २:२७ यशै ४:५-६ ☆ 2:32 २:३२ ओब १७; रोम १०:१३

भाषाय् थुकिया अर्थ “परमप्रभुं न्याय यानादी।”

* 3:2 ३:२ यहोशापात हिब्रू

अन हे जिं उपि जातितयत् न्याय याये,
छाय्धाःसा इमिसं जिमि प्रजा, जिगु उत्तराधिकारी इस्राएल्यात
जाति जातितय् दथुइ छ्यालब्याल यानाबिल,
अले जिगु देशयात ब्वथला बिल।

3 इमिसं जिमि प्रजाया निति चिष्टा तल,
अले वेश्याया पलेसा छम्ह मिजंमचा बिल,
छम्ह मिसामचा मियाः दाखमघ त्वन।

4 “हे टुरोस, सीदोन व पलिशतीया फुक्क लागाय् च्वंपि मनूत, जिनापं छिमिगु
छु ज्या दु? छु छिमिसं जिं यानागु ज्यायागु पलेसा जिके कायेत्यनागु खः ला?
छिमिसं कायेत्यनागु खः धयागु जूसा, व जिं याकनं हे छिमिगु छेनय् प्वंकाबी।”☆

5 छाय्धाःसा जिगु लुँ व वहः अले फुक्कं भिंगु सामान छिमिसं छिमिगु देगलय्
यंकूगु दु।

6 छिमिसं यहदाय् च्वंपि मनूतयत् व यरूशलेमय् च्वंपि मनूतयत् इमिगु देशं
तापाक्क छवयेत ग्रीकतयगु ल्हातय् मियाछवःगु दु।

7 “अथे जुयाः न्यँ, छिमिसं इमित म्यूगु थासं जिं इमित लिकया हये, अले छिमिसं
ब्यूगु पलेसा छिमिगु छेनय् हे प्वंकाबी।

8 छिमि काय् म्हायपिन्त जिं यहदाया मनूतयगु ल्हातय् मियाबी। इमिसं थुमित
तापाक च्वंपि छगू जाति शबायापि मनूतयत् मियाबी,” परमप्रभुं धयादीगु दु।

9 जाति जातितयगु दथुइ थथे धकाः घोषणा या,
लडाइँ यायेत तयार जु!

बहादुर सिपाईतयत् न्यंकि!

दक्क सिपाईतयत् मुंकि अले हमला या।

10 छिमिगु हलोया फालीतयत् दायाः तरवार दय्कि
अले छिमिगु ईचायात दायाः भाला दय्कि।

बम्लाःपिन्सं थथे धायेमा,

“जि बल्ला।”☆

11 हे प्यखेरं च्वंपि जातित, याकनं वा,
अले छिपि सकलें छथाय् हे मुँ।

☆ 3:4 ३:४-८ यशै १४:२९-३१; २३:१-१८; यर ४७:१-७; इज २५:१५-२८:२६; आमो १:६-१०; सप २:४-७; जक ९:१-७; मत्ती ११:२१-२२; लूक १०:१३-१४ ☆ 3:10 ३:१० यशै २:४; मीका ४:३

हे परमप्रभु, छिं थः शरवीरतयत् अन हयादिसँ।

12 “जातित सुरय् जुयाः

यहोशापातया बैसीइ वयेमा,

छाय्धाःसा जिं अन हे

प्यखेरं च्वंपि जातितयग् न्याय यायेत फेतुये।

13 ईँचा संकि, छाय्धाःसा छव लयग् ई जुइ धुंकल।

वा, दाख्यात न्हुतुन्ह,

छाय्धाःसा दाखतिसिगु थाय् जाये धुंकल,

दाखति तइगु गाः जायाः भय्भय् बिल।

इपि तसकं मभिंना वने धुंकल।”☆

14 न्याय याइगु बैसीइ

ग्वाः ग्वाः मनूत मुनाच्चंगु दु,

छाय्धाःसा न्याय याइगु बैसीइ

परमप्रभुया दिं न्ह्यःने हे थ्यंकः वःगु दु।

15 सूर्य व तिमिला खिउँसे च्वनी,

अले नगु थी मखु।

16 परमप्रभु सियोनं तस्सलं हालादी।

वय्कःया सः यरूशलेमं वःगु नँ न्याःगु सः थें च्वं।

आकाश व पृथ्वी थुरथुर खाइ।

परमप्रभु धासाः थः प्रजाया निति शरण कायेगु थाय्

व इस्राएलया मनूतयग् निति किल्ला जुयादी।☆

परमप्रभुया मनूतयत् सुवाः

17 “अले पवित्र पर्वत सियोनय् च्वनीम्ह परमप्रभु

छिमि परमेश्वर जि हे खः धकाः छिमिसं सीका काइ।

अले यरूशलेम पवित्र जुइ,

विदेशीतय्सं हानं गुबलें थन हमला याःवइ मखु।☆

☆ 3:13 ३:१३ प्रका १४:१४-१६,१९-२०; १९:१५

☆ 3:16 ३:१६ यशै १३:१३; यर २५:३०; होशे ११:१०;

आमो १:२

☆ 3:17 ३:१७ इज ३६:८-१२

- 18 “व दिखुन्हु पहाडं तसकं साःगु दाखमघ ज्वया वइ।
 अले डाँडाय् दुरु बाः वइ।
 यहदाया फुक्कं खुसिचाय् लः बा वइ।
 परमप्रभुया देगलय् लःया मूल तज्यानाः लः पिहां वयाः
 शिन्तीमया बैसीयात प्याकी।☆
- 19 तर यहदाय् च्वपिं मनूतय्त अत्याचार याःगुलि
 व द्रुमदुपिनिगु हि बाः वय्कूगुलि,
 मिश्र देश उजाड जुइ
 व एदोम छुं बुया मवइगु मरुभूमि जुयावनी।☆
- 20 यहदा न्ह्याबलेंया निंति
 व यरुशलेम पुस्ता पुस्ता तकं हे मनूतय्गु लागि च्वनेगु थाय् जुयाच्चनी।
- 21 जिं क्षमा मयानानीगु इमिगु हिया दोष,
 जिं क्षमा यानाबी।”
- परमप्रभु सियोनय् च्वनादी।

☆ 3:18 ३:१८ गन्ती २५:१; यहो २:१; ३:१; आमो ९:१३; मीका ६:५
 २१:८-९; हितो ६:१७; यशै ५९:७

☆ 3:19 ३:१९ व्य १९:११-१३;

Newar
Newar: Newar (Bible)

copyright © 2024 Nepal Bible Society and Wycliffe Bible Translators, Inc.

Language: Newar

Contributor: Wycliffe Bible Translators, Inc.

All rights reserved.

2025-05-17

PDF generated using Haiola and XeLaTeX on 19 Dec 2025 from source files
dated 17 May 2025

838cc630-4ccf-5055-be45-10a98a141cc7